

Pelajar UTHM juara Imagine Cup Malaysia

LANGKAWI - Alat kawalan jauh untuk mengawal suis elektrik yang dicipta empat sekawan dari Universiti Tun Hussein Onn Malaysia (UTHM) dinobatkan juara pertandingan penciptaan perisian dan teknologi Imagine Cup Malaysia 2013, yang berlangsung di Resort World di sini.

Kecanggihan produk yang membolehkan pengguna mengawal suis di rumah melalui internet itu membolehkan pasukan 'Triton' mengalahkan dua pasukan dari Universiti Putra Malaysia (UPM) untuk membawa pulang wang tunai berjumlah RM10,000 berserta trofi.

Sementara pasukan G'Adore dengan produk 'DiabeStyle' dan pasukan 4GM dengan produk 'Trashpoint', masing-masing di tempat kedua dan ketiga dan membawa pulang wang tunai RM5,000 dan RM2,500.

Penyampaian hadiah pada hari ini disempurnakan Ketua Pengarah Jabatan Pengajaran Tinggi Prof Morshidi Sirat.

Dengan kemenangan itu, Triton yang dibarisi Muhamad Syamil Aiman A. Aziz, 22, Siti Salwani Yaacob, 22, Muhamad Faqih Roslan, 21, dan Mohamad Fadhil Jalani, 21 akan mewakili Malaysia ke pertandingan akhir peringkat antarabangsa di Saint Petersburg, Russia tahun depan.

Ketua kumpulan, Muhamad



Pasukan 'Triton' dari Universiti Tun Hussein Onn Malaysia (UTHM) muncul juara setelah mencipta alat kawalan jauh untuk mengawal suis di rumah melalui internet pada Pertandingan Imagine Cup Malaysia 2013 di sini semalam. Mereka akan mewakili Malaysia ke pertandingan akhir peringkat antarabangsa di Russia tahun depan.

Syamil Aiman A. Aziz berkata pengguna hanya perlu memasang produk ciptaan mereka di mana-mana suis di rumah dan mengawalnya melalui internet.

Katanya produk itu dicipta khusus bagi pengguna yang sering alpa untuk mematikan suis selepas menggunakanannya selain mampu menjimatkan elektrik.

"Kami mengambil masa lebih kurang satu tahun untuk membuat kajian terperinci selain membuat perbandingan dengan produk-produk lain yang ada di pasaran sehingga tidak kami tidak menentu.

"Alhamdulillah, kini semuanya

terbalas dan misi kami seterusnya untuk menjulang bendera Malaysia di Russia dalam pertandingan yang sama tahun hadapan," katanya yang mendapat idea ciptaan daripada konsep teknologi hijau.

Imagine Cup Malaysia merupakan pertandingan teknologi melibatkan pelajar Intituisi Pengajaran Tinggi yang diadakan setiap tahun bagi memilih wakil Malaysia ke peringkat antarabangsa.

Naib Canselor Universiti Teknikal Malaysia Melaka (UTeM) Datuk Dr Ahmad Yusoff Hassan berkata pertandingan Imagine Cup merupakan pertandingan mencipta

perisian yang terkenal dan dianjurkan setiap tahun.

Katanya ia adalah sebagai platform untuk melahirkan pelajar yang matang daripada segi kebolehan mencipta, meneroka idea baharu serta mengembangkan hasil inovasi ke peringkat yang lebih tinggi.

"Untuk penganjuran kali ini, sebanyak 21 pasukan dari seluruh Institut Pengajaran Tinggi Awam (IPTA) dan Institut Pengajaran Tinggi Swasta (IPTS) mengambil bahagian," katanya.

UTeM merupakan sekretariat Imagine Cup Malaysia sejak 2009. Bernama